

1 & 2 Krónikanan

Dios a laga Su puebel sa ku si nan ta desobedesé, nan lo sufri e konsekuensianan. Esei ta presis loke a sosodé. E puebel hebreo a wòrdu konkistá i hibá komo katibu na diferente nashon. E habitantenan di Juda a eksperensiá 70 aña di kaptividat na otro nashon promé ku nan a haña libertat pa regresá bèk na nan pais.

Nan regreso a tuma lugá den tres fase. 1) Zorobabel a hiba un grupo bèk na Israel (Esdras 1-6) na mas òf ménos aña 538 B.C. 2) Esdras a hibra e di dos grupo bèk mas òf ménos na aña 458 B.C. (Esdras 7-10). 3) Nehemias a regresá na aña 445 B.C. (Nehemias 1-13). Probabelmente e no tabata kompañá pa tantu hende manera e promé dos grupo.

E hudiunan ku a regresá for di Babilonia motivá pa nan fe den Señor tabata den un situashon miserabel. Komo desendientenan di Abraham, nan tabata disididu pa biba bèk den e tera ku Dios a primintí nan i rekonstruí e tèmpel na Yerusalem. Ma kos no a bai bon. No tabata fásil. Tabatin oposishon i luchanan finansiero. Poko poko nan a stop di warda sabat, e rikunan a oprimí e pobernan, hudiunan a kasa ku paganonan, apostasia tabata infiltrá. Ademas, nan no a duna e dèsimu pa sostené aodrashon na tèmpel. Komo resultado e saserdotnan i levitanan a haña nan obligá pa bandoná Yerusalem pa buska trabou otro kaminda.

E hendenan tabatin mester di un mensahe pa enkurashá nan spiritualmente. Pesei e eskritor di Krónikanan a skribi ku un meta spiritual/religioso. Pa hasi esei, el a selektá informashon for di Adam te na e eksilio pa kòrda nan di Dios Su promesanan i plannan pa ku 1) e tera; 2) nan identidat komo un nashon; 3) David su desendientenan real; 4) e saserdotenan di tribu di Leví; 5) e tèmpel; i 6) adorashon bèrdadero.

Ta importante pa komprendé ku e outor su meta no tabata simpelmente pa relatá historia di e puebel hudiu. Ta parse ku el a sali for di punto di bista ku su lektornan por lesa e bukinan di Samuel i Reinan ku ta un relato historiko-polítiko i real di e hebreonan. En kontraste, 1 & 2 Krónikanan su foko ta muchu mas riba e parti religioso i spiritual. Pesei el a selektá historia ku ta demonstrá ku e desendientenan di Abraham a eksperensiá Dios Su bendishon solamente ora nan a obedesé, adorá i sirbi Señor.

Ku esaki na bista, ta interesante pa kompará e bukinan di Reinan ku Krónikanan.

- Reinan ta deskribí historia di tantu Israel komo Juda. Krónikanan su foko ta riba Juda.
- Reinan ta mensioná eventonan ku a sosodé durante reinado di e reinan di Israel i Juda. Krónikanan ta konsentrá riba David i su desendientenan real.
- Gueranan ta mas komún den Reinan, mientras e tèmpel ta destaká den Krónikanan.
- E perspektiva di profetanan ta bin dilanti hopi den Reinan, mientras ku Krónikanan tin un perspektiva saserdotal.

Den nos Beibel, por haña e bukinan di Krónikanan despues di e bukinan di Reinan, nèt *promé* ku Esdras i Nehemias. Ma esei no ta e kaso ku e Skrituranan hebreo. Ta interesante ku Krónikanan ta e último buki, 14 buki despues di Reinan. Krónikanan tambe ta lokalísá *despues* di Esdras-Nehemias.

I. NÒMBER DI E BUKI

Na idioma hebreo, e buki tabata yama DIBRE YAMIM, ku ta nifiká “kuenta (palabranan òf eventonan) di e dianan”. Ku tradukshon di Tèstament Bieu na idioma griegu (yama Septuaginta òf LXX), e buki tabata yamá PARALEIPOMENA, ku ta nifiká “di kosnan saltá”. Esaki ta referí na informashon ku e buki di Krónikanan ta agregá na e informashon hañá den e bukinan di Samuel i Reinan.

Ma e nòmber aki ta hasi e buki di Krónikanan parse manera un buki di ménos importansia—informashon saltá; informashon no inkluí den e bukinan “prinsipal”. En realidat, Krónikanan ta un buki hopi importante—ma hopi ignorá, asta awendia. Lesadónan moderno ta stòp di lesa promé ku nan ta kaba lesa e promé nuebe kapítulo di genealogianan.

Jerome, traduktor di Tèstament Bieu na latin, a bisa ku e buki ta kontené “e krónika di henter historia sagrado”. Dor di Jerome, nos ta haña e nòmber “Krónikanan” pa e buki referiendo na un relato di eventonan i susesonan.

Méskos ku 1 i 2 Samuel i 1 i 2 Reinan, e teksto hebreo di 1 i 2 Krónikanan ta un solo storia. Tambe, méskos ku e bukinan di Samuel i Reinan, originalmente 1 & 2 Krónikanan a forma ún solo buki—ún ròl. Probabelmente e buki a wòrdu partí den dos buki tempu ku el a wòrdu tradusí na idioma griego, na mas òf ménos aña 200 B.C. Pues nos konosé e promé ròl komo 1 Krónikanan i ròl dos komo 2 Krónikanan.

II. OUTOR DI E BUKI

E outor di e buki a skohe pa no identifiká su mes. Tur evidensia ta muestra den direkshon ku e buki aki tabata obra di ún solo outor. Ta evidente tambe ku e outor aki a usa hopi fuente. Te asta hopi studiante di Beibel ta haña ku e stail, contenido, i interes di e outor di Krónikanan i e bukinan di Esdras i Nehemias ta asina similar ku nan ta konvensé ku ún outor ta responsabel pa tur tres buki.

Ken por ta e outor di e buki? Hopi studiante di Beibel ta haña ku esun ku a skirbi e buki di Krónikanan tambe tabata eskritor di Esdras i Nehemias. Talmud hudiu ta bisa ku eskritor tabata e eskriba, Esdras. —ku e tabata outor di. Esdras sin duda tabata kapasidá pa ta e kompiladó i outor di e bukinan aki ku ta kontené tantu informashon.

Segun Gleason Archer, komo e arkitekto prinsipal di e re-introdukshon moral i spiritual di e nashon di Israel, Esdras lo tabatin e motivashon pa produsí e tipo di buki aki. Nota algun argumento ku ta muestra den direkshon di Esdras komo outor di 1 & 2 Krónikanan.

1) E echu ku e tabata un levita i saserdote ta kuadra ku e diferente énfasis di e buki. E siguiente tekstonan ta demonstrá interes pa ku personal levítico di e tèmper en partikular: 1 Krónikanan 6; 9:2-34; 15:2-27; 23:2-6,26-32; 24:30-31; 26:17-20; 28:13-21; 2 Krónikanan 5:4-12; 11:13-16; 13:9-10; 17:8; 19:8-11; 20:14,19; 23:2-8,18; 24:5-6,11; 29:4-34; 30:15-27; 31:2-19; 34:9-13,20; 35:3-18.

2) Final di e buki di 2 Krónikanan (36:22-23) i komienso di e buki di Esdras (1:1-3a) ta identiko. E tekstonan aki ta papia di e dekreto di Siro pa pèrmití e hudianan pa regresá na nan pais. Hopi studiante di Beibel ta haña ku esaki ta un indikashon ku e bukinan aki den pasado tabata uní i ku esaki ta demonstrá ku e bukinan tabatin e mésun outor

3) Ta parse ku gobernadó di Yerusalem, Nehemias, tabatin un libreria basta ekstense. Segun 2 Makabeonan 2:13-15, “El, kuminsando un libreria, a kolektá bukinan tokante e reinan i profetanen, i e bukinan di David i kartanan di reinan tokante regalonan sagrado”. Si Nehemias tabatin un libreria asina, sin duda Esdras (Nehemias su kolaboradó) tabatin tur libertat pa hasi uso di e libreria pa kompilá e informashon pa e buki di Krónikanan.

Apesar di esaki, tin otro argumento ku ta lamta pregunta si e eskritor tabata Esdras. 1) E duplikashon di teksto na final di 2 Krónikanan i komienso di Esdras no ta proba ku Esdras a skirbi e bukinan. Esaki por ta esfuerso di un otro outor pa uni su buki ku 2 Krónikanan. 2) Maske algun studiante di Beibel ta haña ku e bukinan tin e mésun perspektiva i pensamentu, otronan no ta konvensé ku esei ta e kaso. Por ehèmpel, outor di Esdras-Nehemias ta pone hopi énfasis riba sabat,

algu ku eskritor di Krónikanan no ta hasi. En kontraste, Krónikanan ta hopi interesá pa ku profetanán i nan sermonnan, algu ku Esdras-Nehemias no ta demonstrá. Desendientenan real di David ta hopi importante den Krónikanan, ma kasi ta ignorá den Esdras-Nehemias.

Di nos perspektiva, ta parse hopi pusíbel—asta probabel—ku Esdras tabata e outor, maske nos no por ta shen porshento sigur di esei. Si no tabata Esdras, anto e eskritor mester tabata un levita bon eduká ku a biba mas òf ménos mésun tempu ku Esdras.

III. FECHA DI E BUKI

E buki no por a wòrdu skirbi promé ku Juda a wòrdu hibá komo katibu den eksilio. Ún Krónikanan 6:15; 9:1; 3:16-24 ta laga sa ku e tragedia ei a sosodé ya kaba ora e buki a wòrdu skirbí. E konkista di Yerusalem a sosode 587-586 B.C.

Ekspertonan di idioma hebreo ta haña ku e hebreo usá den Krónikanan no ta asina puru ku e hebreo ku a wòrdu usá promé ku e eksilio. Durante e eksilio e hudiunan a siña e idioma arameo, i esei ta visto den e buki aki.

Den 2 Krónikanan 36:23, Siro a duna su dekreto kaba ku a terminá e eksilio. Esei lo a tuma lugá mas òf ménos na aña 539 B.C. Por haña nòmber di esnan ku a regresá i a biba na Yerusalem i e statnan den e bisendario ei despues di eksilio den 1 Krónikanan 9.

Un otro indikashon pa un pusíbel fecha pa e buki por wòrdu hañá den 1 Krónikanan 3:17-24. E teksto aki ta lista e genealogianan di e desendientenan real di famia di David sikiera dos generashon despues di Zorobabel, ku tabata na bida durante siglo sinku B.C.

Tambe 1 Krónikanan 29:7 ta laga sa e montante ku e hendenan di Israel a kontribuí. Loke ta interesante ta ku e suma ta kontá na “*drakma*”. “*Drakma*” tabata un moneda di Persa ku rei Dario a introdusí despues di aña 515 B.C. Pues, e buki lo mester a wòrdu skirbí despues di e fecha ei.

Ta parse ku 1 Krónikanan 3:17-24 ta mustra den direkshon ku e buki a wòrdu skirbí basta aña despues ku e hudiunan a regresá for di eksilio na Babilonia, talbes entre 450 i 400 B.C.

Si Esdras ta eskritor di Krónikanan, e buki lo a wòrdu skirbí despues ku el a regresá bèk na Yerusalem na aña 457 B.C. Pues e fecha di 450-425 B.C. ta parse probabel.

IV. LEKTORNAN DI E BUKI

Esnan ku a lesa e buki di Reinan, a eksperiensí e destrukshon di Yerusalem i kaptividat di e rei sucesor desendiente di David. Nan tabatin preguntanan serio: “Dios a laga nos na kaya? Dios a bandoná nos? Kon esei por a sosodé ku nos—e puebel skohí di Dios? Ta pusíbel ku Marduk, dios di Babilonia, ta mas poderoso ku Jehovah Dios?” E eskritor ta trata ku nan interogantenan i inkietutnan.

En kontraste outor di Krónikanan a biba hopi tempu despues. E lektornan tabata hende ku tabata biba bèk na Yerusalem den un situashon difísil. E nesesidatnan di e generashon ku lo lesa un buki lo ta otro for di e generashon ku a lesa e buki di Reinan. Su lektornan lo tabata hasi otro pregunta, “Kiko Dios Su promesanan pa ku Israel, Yerusalem, i David promé ku eksilio tin di hasi ku nos ku ta biba despues di eksilio? Nos ta pueblo di Dios ainda? Dios a kibra Su aliansa ku Israel? Dios ta interesá pa ku nos?” Pesei e outor ta produsí un otro historia di e nashon, pa kontestá otro pregunta.

Pues, pa ken e outor-kompiladó a skirbi?

E outor ta usa e frase “*tur e tribunan di Israel*” i “*tur e kas di Israel*” vários biaha. “*Tur Israel*” ta usá mas ku 40 biaha. Sin duda e eskritor tabata skirbi pa e Israel nobo uní—hudiunan di e nashon suit di Juda ku tabata na bida despues di 70 aña di eksilio.

Ma ta parse ku kisas el a skirbi pa un grupo mas spesífiko. E buki tin hopi énfasis riba Yerusalem i e tèmper. E habitantenan di Yerusalem—ku a bolbe for di eksilio na Babilonia—ta listá den 1 Krónikanan 9. Ta parse ku e outor tabata skirbi spesifikamente pa esnan ku a regresá i tabata biba na Yerusalem, unda e tèmper tabata lokalísá.

V. PROPOSITO DI E BUKI

E outor no ta bisa kla kiko su proposito ta. Ma dor di evaluá e informashon ku e ta inkluí i e informashon ku *no* ta forma parti di e buki, nos por haña algun indikashon di su proposito. Pa hasi esaki, nos lo kompará contenido di e bukinan di Samuel i Reinan huntu ku contenido di e buki di Krónikanan i opservá tres kategoria di informashon: 1) Informashon ku Samuel i Reinan ta inkluí ku Krónikanan tambe ta inkluí. 2) Informashon ku Samuel i Reinan ta inkluí ku Krónikanan *no* ta inkluí. 3) Informashon ku Krónikanan ta inkluí ma ku Samuel i Reinan *no* ta inkluí.

E promé kategoria ta identiko. No tin nodi di studia esei. Ma nos ke nota contenido di e otro dos kategoria i mira si nos por dedusí e proposito di e outor tabatin ora el a skirbi e buki di Krónikanan:

A. LOKE KRÓNIKANAN TA SALTA

Lo siguiente ta algun ehèmpel di informashon ku a outor di Krónikanan no a inkluí den su buki, ku ta informashon ku nos por haña den e bukinan di Samuel i Reinan:

- Bida di Samuel i su ministerio - 1 Samuel 1-7
- Bida di Saul i su reino - 1 Samuel 8-15
- David su bida (inkluyendo tempu e tabata fugitive) - 1 Samuel 16-30
- Dos reino despues di morto di Saul: David na Hebron i Is-boset na Israel - 2 Samuel 2-4
- David su adulterio i matamentu - 2 Samuel 11-12
- Amnon su piká ku Tamar – 2 Samuel 13
- Rebellion di Absalon - 2 Samuel 14-20
- Maldishon di Simei – 2 Samuel 16:5-14
- Adonias ta buska a trono pa su mes - 1 Reinan 1
- Salomon su vengansa kontra enemigunan di David – 2 Reinan 2
- Salomon ta kasa ku yu muhé di Farao - 1 Reinan 3
- Salomon su palasio - 1 Reinan 7
- Salomon su esposananan, konkubinan, i enemigunan i idolatria - 1 Reinan 11
- Tur e historia di e reinan di a reino di nort, Israel - 1 Reinan 12 - 2 Reinan 17
- Rei Abiam su pikánan - 1 Reinan 15:3-5
- Josafat i Joram ta bai guera - 2 Reinan 3
- Ezekias su regalo na Senakerib - 2 Reinan 18:13-16
- Joakaz su maldat - 2 Reinan 23:32
- Joakim su rebelion i enemigunan - 2 Reinan 23:35 - 24:4
- Sierto detaye di e konkista di Yerusalem i kaptúra di Zedekias - 2 Reinan 25:1-7,18-21
- Gedalias su puesto i morto - 2 Reinan 25:22-26
- Joakin ta haña su libertat - 2 Reinan 25:27-30

Hopi di e informashon ku no a wòrdu inkluí den Krónikanan ta papia negativo di desendientenan real di David. Ta parse ku e outor di Krónikanan ke presentá e pensamentu ku apesar di a faltanan di e desendientenan di David, tòg Dios a bendishoná nan pa motibu di David su rektitut i su promesa na David.

Por nota ku, kuminsando ku David, e outor ta salta tur informashon ku no tin di hasi ku e dinastia di David. Pesei, por ehèmpel, e pikánan di Amnon, Absalon, Adonias, i Salomon no ta mensioná. Mensionando esei lo no kontribuí na e outor su lema. Di igual manera, e nashon di nort, Israel tampoko no ta fortifiká su lema enfatisando e dinastia di David, e dinastia ku Dios a outorisá.

B. LOKE KRÓNIKANAN TA AGREGÁ

Ma tambe tin informashon ku Krónikanan ta inkluí ku bo no por haña den e bukinan di Samuel i Reinan. Entre otro e informashon ei ta lo siguiente:

- Generashonnan - 1 Krónikanan 1-9
- Ehèrsito di David na Hebron - 12:23-40
- Detayenan di e regreso di e arka - 13:1-5; 15-16
- Detayenan di David su senso kontra boluntat di Dios – 21
- David su preparashonnan pa konstrukshon di a tèmpel – 22
- David su organisashon di levitanan pa traha na e tèmpel - 23-24

- David su organisashon di músikonan na e tèmpel - 25
- David su organisashon di e trahadónan sivil na e tèmpel - 26-27
- David su donashonnan pa konstruskhon di e tèmpel - 29
- Levitanan ku a keda leal na Roboam - 2 Krónikanan 11:13-17
- Roboam su fortifikashonnan i famia - 11:5-12,18-23
- Asa konfrontando e etiopenan – 14:9-15
- Asa su reformashonnan i piká – 15; 16:7-10
- Josafat su fortifikashonnan, reformashonnan, apuntashon di levitanan pa instruí, spiertamentu di profeta Jehu, orashon, i liberashon for di Moab – 17-20
- Joram su matansha di su rumannan, invashonnan, i enfermidat – 21
- Joida su morto - 24:15-16
- Piedramentu di Zakarias - 24:20-22
- Joas su pikánan - 24:17-19
- Sirionan ta derotá Juda - 24:23-24
- Amasias ta kontratá soldánan i su piká - 25:5-10,14-16
- Uzias su ehersito i programa di konstrukshon - 26:6-15
- Jotam su derota di e amonitanan - 27:5-6
- Akaz ta kastigá dor di a edomitanan i filisteonan - 28:17-19
- Ezekias ta purifiká i konsegrá e tèmpel, ta bolbe introdusí e selebrashon di Pasku, i otro kambionan, rikesa i konstrukshon di defensanan kontra Senakerib - 29-32
- Kaptividat di Manasés, su repintimentu i liberashon - 33:11-17
- Josias su reformashonnan – 34-35
- Siro su dekreto - 36:22-23

Hopi di a informashon adishonal aki ta relashoná ku establesementu di adorashon na e tèmpel. Tambe e ta relashoná ku evaluashon di David su desendientenan. Ta parse ku e storianan adishonal ta pone énfasis riba desishonnan basá den konfiansa den Dios. Informashon adishonal ta duná tokante profetanán Samuel, Gad, Natan, Ahias, Semaias, Hanani, Jehú, i asta Elias. Otro profetanán ta mensioná ku no ta aparesé den otro teksto den Beibel: Asaf, Heman, Jedutan, Ido, dos profeta ku nòmber di Obed, Jehaziel, i Eliazer.

A base di e informashon aki Jeffrey Townsend ta haña ku e proposito di outor di Krónikanan tabata pa motivá e hudiunan ku a regresá for di eksilio pa ku nan adorashon na e tèmpel dor di konsientisá nan di nan laso pa ku e promesanan etèrno ku Dios a hasi na David. Donald Demaray ta haña ku e proposito ta similar: Krónikanan ta un historia di e kontinuashon di e desendientenan di David ku referensia spesial na e tèmpel, saserdotenan i adorashon.

Segun Gleason Archer, e outor tin un proposito konkreto den su mente pa repasá historia di pueblo di Dios. E ke rekordá e hudiunan di nan pasado spiritual (asta mustrandó nan relashon ku e patriarkanán) i motivá nan pa apresiá nan relashon spesial ku Dios; mustrandó ku nan relashon ku Dios ta di suma importansia. E outor ta pone énfasis riba e forma preskribí di adorashon na tèmpel, e saserdosio apuntá pa Dios, i e dinastia di David ku Dios tambe a skohe.

E eskritor ke motivá e puebel di Dios pa obedes'E i ador'E. E ta mustra kla ku Dios ta bendishoná esnan ku ta hasi esei!

VI. STRUKTURA DI E BUKI

Por dividí e buki den tres sekshon general: genealogianan (1 Krónikanan 1-9), e reino uní bou guia di David i Salomon (1 Krónikanan 10 – 2 Krónikanan 9), i e reino dividí (2 Krónikanan 10-36). Ma un manera mas komún pa mira e buki di Krónikanan ta lo siguiente:

- I. PRÓLOGO GENEALÓGIKO—ADAM TE DAVID – 1 Krónikanan 1:1 - 9:44
 - A. Adam te Jakòb - 1:1 - 2:2
 - B. Jakòb su generashonnan - 2:2 - 9:44
- II. HISTORIA DI REI DAVID - 10:1 - 29:30
 - A. Morto di Saul - 10:1-14
 - B. Kaptúra di Sion i Yerusalèm di David - 11:1 - 12:40
 - C. Prosperidat di David su reino - 13:1 - 22:1

- D. David su planifikashon pa adorashon - 22:2 - 29:30
- III. HISTORIA DI REI SALOMON – 2 Krónikanan 1:1-9:31
 - A. Salomon su rikesa i sabiduria - 1:1-17
 - B. Salomon su konstrukshon i dedikashon di e tèmpe - 2:1-7:22
 - C. Salomon su aktividatnan i morto - 8:1 - 9:31
- IV. HISTORIA DI E REINAN DI JUDA - 10:1-36:23
 - A. Roboam te Zedekias - 10:1 - 36:21
 - B. Dekreto di Siro - 36:22-23

Kòrdando e outor su meta pa mostra ku e úniko manera pa eksperensia Dios Su bendishon ta dor di obedensé, adorá i sirbi Señor, ta interesante pa mira kon kada divishon ta enfatisá e outor su meta. *The Revell Concise Bible Dictionary* ta mostra ku den 1 Krónikanan 1-9, historia ta demonstrá ku Dios a obra pa ku e puebel ku El a skohe foi komienso. Kapítulon 10-29, historia ta demonstrá ku éksito nashonal ta resultado di rektitut. Den 2 Krónikanan 1-9, historia ta demonstrá ku adorashon di Dios ta produsí prosperidat. I den kapítulon 10-36, historia ta demonstrá ku e reinan ku a adorá i obedesé Dios tabata bendishoná ku éksito sobrenatural.

VII. OPSERVASHONAN DI E BUKI

Nos ke enfatisá diferente punto di e buki di Krónikanan:

A. RIPITISHON DI HISTORIA

Nos a mensioná kaba ku tin bastante similaridat entre e historia di Samuel i Reinan i Krónikanan. Ma, manera nos a mira ya kaba, e proposito di e bukinan di bèrdat ta determiná e contenido. E proposito di e bukinan no ta idéntiko, maske e contenido ta parse méskos.

Un outor ta kompará e bukinan di Samuel-Reinan i Krónikanan ku e evangelionan. Tur kuater evangelio ta konta di bida di Jesus. Mateo, Marko i Lukas ta kubri hopi di e mésun eventonan i informashon. Ma e evangelio di Juan—ku tin komo proposito pa konvensé su lektornan ku Jesus ta Dios—ta ignorá hopi di e storianan ku e otro evangelionan ta inklui i ta agregá eventonan ku e otroan a ignorá. Pues, maske por parse ku ta un repetishon di historia, e outornan ta mira e eventonan for di un otro perspektiva.

Nota kon e outor di Krónikanan ta kuminsá su buki ku un lista largu di generashonnan. E ta dediká nuebe kapítulo pa esaki. Di nos perspektiva, esei talbes ta un di e maneranan mas malu pa inisiá un buki. Ma pa un hudu, esei sigur no ta espasio gasta pornada den un buki! Pa nan, e lista di generashonnan tabata sumamente interesante. E lista i e historia ta demonstrá Dios Su gracia pa ku e hudu for di Adam te Siro. E ta enfatisá Dios Su selekshon di Israel riba tur otro pueblo, Su selekshon di Juda riba e otro tribunan, i Su selekshon di e liña real di David.

E buki ta habri konsentrando riba antepasadonan di David, ta konta di e reino rekto di David, i ta kontinuá ku foko riba e desendientenan di David, mirando e impakto di David su reino rekto. Nota kuantu kapítulo e outor di Krónikanan ta dediká pa ku David (1 Krónikanan 11-29). Esei ta suma trinta porshento di henter e buki. En kontraste, rei Saul kasi a wòrdu ignorá. E ta haña espasio den ún kapítulo so, i einan Saul ta mensioná solamente pa introdusí David!

Tambe ta notabel ku Salomon su reino ta forma diesdos porshento di e buki. Ningun otro rei ta haña mes tantu atenshon ku David i Salomon. Anto kòrda ku e outor a skirbi solamente di e reinan di Juda. E no ta mensioná e reinan di Israel mes, ku eksepsion di eventonan ku tin algu di hasi ku reino di Juda.

Nota tambe ku e buki di Krónikanan ta bai sigui ku historia di e pueblo hudu dos versíkulo mas leu den tempu ku e buki di Reinan. E buki di Reinan ta klousurá ku konkista di Yerusalèm (587-586 B.C.) i liberashon di rei Joakin (561 B.C.). En kontraste, Krónikanan ta kaba ku dekreto di Siro (539 B.C.). E outor ke mostra Dios Su fieldat asta den e dekreto di Siro. (Kòrda ku Isaias a profetisá tokante Siro den Isaias 44:28 - 45:4, asta mensionando su nòmber). Sigur kumplimentu di

e profesia tokante Siro lo a hasi un impakto pa ku e hudiunan. Nan lo mira ku Dios ta fiel pa kumpli ku Su promesanan asta den nan era.

Nò! Krónikanan no ta ritishon di historia. E ta un relato históriko for di un perspektiva spiritual—ku un proposito spiritual.

B. GENEALOGIANAN

Pa nos e genealogianan di 1 Krónikanan 1-9 ta un lista laf i innesario. Ma hudiunan den e era ku e buki a wòrdu skirbi lo a mira e listanan aki ku henter un otro perspektiva. Nan tabata hasi pregunta tokante nan relashon ku e pueblo di Dios ku a eksistí promé ku eksilio. Nan tabata ke sa si Dios a bandoná nan. E genealogianan ta kontestá nan preguntanan, kuminsando ku Adam. E genealogianan ta demonstrá kla ku e hudiunan ta kontinuá komo e pueblo di Dios.

E genealogianan tambe tabata algu hopi praktiko pa hudiunan di e era ei. Esaki a demonstrá ken tabatin derechu di ta saserdote (komo desendiente di Aaron), ken mester haña kua tereno, ken tin derechu pa ku sierto erensia, èts.

Ta interesante ku maske e outor ta konta e historia spesífikamente di e nashon di Juda, tòg e ta mensioná “*henter Israel*” (1 Krónikanan 9:1; 11:1,10; 12:38; 14:8; 15:3,28; 18:14; 2 Krónikanan 1:2; 7:8; 9:30; 10:3,16; 12:1; 13:4,15; 18:16; 24:5). E ta lista tur e tribunanan di Israel den e genealogianan ku eksepshon di Zabulon i Dan. Hasiendo esaki, e eksritor di Krónikanan ta komuniká ku e ta konsiente ku pueblo di Dios ta konsistí di mas ku hende di tribu di Juda. Ma e eskritor tambe ta indiká ku e desendensia di David ta kontinuá dor di e puebel di Juda.

C. LEMANAN DEN E BUKI

E buki di Reinan ta pone énfasis pisá riba e echu ku pueblo di Dios a bira katibu pa motibu di nan piká. Ora profetanan a prediká e mensahe ei, hopi hudu di e era ei a reklamá. Nan a bisa ku nan antepasadonan a hasi piká i nan tin ku sufri e konsekuensianan. “*E tatanan a kome wendruif zür, i djente di e yunan ta kohe rel*” (Jeremias 31:29; Ezekiel 18:2). Buki di Krónikanan, en kotnraste, ta enfatisá ku no tur ora Dios ta posponé kastigu pa piká...ku kada generashon por sufri kastigu pa nan pikánan durante nan bida.

Tin diferente lema ku ta destaká den e buki:

1. Buska Señor

Relashoná ku esaki por mira hopi biaha ku e outor ta enfatisá “*buska Señor*” den bon i den malu (1 Krónikanan 10:13-14; 22:19; 28:9; 2 Krónikanan 11:16; 12:14; 14:4,7; 15:2,4,12,13,15; 16:12; 17:4; 18:4; 19:3; 20:4; 22:9; 25:20; 26:5; 30:19; 31:21; 33:12; 34:3). Krónikanan tambe ta indiká si bo umiyá bo mes òf no umiyá bo mes, esei ta determiná Dios Su reakshon (2 Krónikanan 12:6-7,12; 28:19; 30:1; 33:12,19,23; 34:27; 36:12). Orashon (1 Krónikanan 4:10; 5:20; 17:16; 21:26; 29:10; 2 Krónikanan 1:8-10; 6:13-42; 7:14; 13:12-15; 14:1; 18:31; 20:5-12; 30:18,27; 32:20,24; 33:13,18-19) i repintimentu (2 Krónikanan 6:37; 7:14; 12:6-12; 15:4; 30:6,9; 32:26; 33:12; 36:13) tambe ta bin dilanti ku frekuensia.

2. Adorashon

E eskritor di Krónikanan a enfatisá adorashon kolektivo mas tantu ku adorashon individual. E ta referí na dos selebrashon di Pasku (ora Dios a salba Israel for di Egipto—tempu di e eksodo) bou di guia di Ezekias i Josias (2 Krónikanan 30:13-22; 35:1-19). Otro reunionnan pa adorá Dios ta bin dilanti (1 Krónikanan 16; 29:9-22; 2 Krónikanan 5:2-14; 6:3-7:10; èts.). Tambe e eskritor a dediká bastante espasio pa ku e ròl di saserdosio i levitanan (1 Krónikanan 24-26; 2 Krónikanan 17:7-9; 19:11). E ke sòru ku esnan ku ta sirbi komo saserdote ta esnan ku Dios a skohe. Por mira esaki den e lista di generashonnan di e levitanan—desendentenan di Aaron en particular (1 Krónikanan 6). E tèmpel ta un énfasis di e buki. Tantu preparashon ku David a hasi pa konstrukshon di e tèmpel i adorashon na e tèmpel ta destaká (1 Krónikanan 22-26). Salomon su preparashonnan, konstrukshon i mueblamentu di e tèmpel ta aparsé den 2 Krónikanan 2-4. E arka tambe ta prominente. Den 1 Krónikanan 13, nan ta trese e arka for di Kiriath-jearim. Kapítulonon 15-16 tambe ta referí na e arka, ora David a tres’é na Yerusalem.

3. Bon i malu

Un otro lema ku ta visto ta Dios Su evaluashon di kada rei—ku Su énfasis riba hasimentu di loke ta bon, rekto, hustu (2 Krónikanan 14:2; 20:32; 24:2; 25:2; 26:4; 27:2; 28:1; 29:2; 30:4; 31:20; 34:2). Di igual manera, Señor a nota ora reinan a hasi maldat (2 Krónikanan 12:14; 21:6; 22:4; 29:6; 33:2,6,9,22; 36:5,9,12).

4. Bendishon i huisio

E buki ta demonstrá ku tin bendishon i rekompensa pa obediensia: viktoria militar, ehersito grandi, èts. (1 Krónikanan 11:4-9; 14:8-14; 2 Krónikanan 7:13,19-20; 9:13-22; 26:6-15; èts.). Di igual manera, Krónikanan ta mostra ku deobediensia ta okashoná Dios Su huisio: problema, derota militar, enfermedat, èts. (2 Krónikanan 28:1-8; 33:1-11; èts.)

D. DOKUMENTONAN USÁ DEN E BUKI

Dependiendo di e fecha eksakto ku e buki a wòrdu skirbí, ta kasi sigur ku e outor tabatin aksesu na kasi tur e bukinan di Tèstament Bieu. Talbes e no tabatin tur e bukinan profétiko, pasobra pusíbelmente algun di nan, (p.e. Malakias) no a wòrdu skirbí ainda.

Ta sigur ku el a hasi uso di e bukinan di Samuel i Reinan. Tin mas òf ménos 40 teksto den Krónikanan ku tin e méson contenido ku e relato den Samuel i Reinan. Ademas, no ta pusíbel pa bisa ku siertitut kuantu informashon el a tumá *indirèkt* for di Samuel i Reinan. Tambe e eskritor a hasi uso di otro Skrituranan fuera di Samuel i Reinan. Por ehèmpel 1 Krónikanan 16 ta sita Salmo 105:1-15 i Salmo 96:1-15.

Maske mas ku mitar di e informashon den Krónikanan ta informashon ku ta kubri e méson historia ku otro bukinan den Tèstament Bieu, esepialmente Samuel i Reinan, ta masha riparabel for di e teksto ku e outor-kompiladó a hasi uso di hopi otro dokumento den su skirbimentu di e buki. Di bèrdat ningun otro eskritor humano di Skritura ta mihó dokumentá. Nos por nota tres diferente katagoria di dokumento. (Agun di e dokumentonan ku nos ta lista kisas ta e méson dokumento ku otro nòmber.)

REKORTNAN OFISIAL	
1.	Registro di e Krónikanan di rei David - 1 Krónikanan 27:24
2.	Buki di e Reinan di Israel i Juda - 2 Krónikanan 27:7; 35:27; 36:8 Talbes esei ta e méson buki ku...
3.	Buki di e Reinan di Juda i Israel - 2 Krónikanan 16:11; 25:26; 28:26; 32:32
4.	Buki di e Reinan di Israel - 1 Krónikanan 9:1; 2 Krónikanan 20:34; 33:18
5.	Historia (komentario) di e buki di Reinan - 2 Krónikanan 24:27
6.	Skirbimentu di David, rei di Israel - 2 Krónikanan 35:4
7.	Skirbimentu di Salomon - 2 Krónikanan 35:4
8.	Proklamashon di Siro - 2 Krónikanan 36:22-23
SKIRBIMENTUNAN I REKORTNAN PROFÉTIKO	
1.	Krónikanan di Samuel, e miradó - 1 Krónikanan 29:29
2.	Krónikanan di Natan e profeta - 1 Krónikanan 29:29; 2 Krónikanan 9:29
3.	Krónikanan di Gad e miradó - 1 Krónikanan 21:9; 29:29
4.	Profesia di Ahias e silonita - 2 Krónikanan 9:29
5.	Vishonnan di Ido e miradó - 2 Krónikanan 9:29; 12:15
6.	Relato di profeta Ido - 2 Krónikanan 13:22
7.	Buki di profeta Semaias - 2 Krónikanan 12:15
8.	Historia di Jehú yu hòmber di Hanani - 2 Krónikanan 20:34
9.	Echunan di Uzias ku profeta Isaías a skirbi - 2 Krónikanan 26:22
10.	Vishon di profeta Isaías - 2 Krónikanan 32:32
11.	Komentarionan di e miradónan - 2 Krónikanan 33:19
OTRO PUSÍBEL FUENTENAN	
1.	Listanan di generashonnan - 1 Krónikanan 4:33; 5:17; 7:9,40; 9:1,22; 2 Krónikanan 12:15
2.	Plannan di David pa konstrukshon di tèmpele - 1 Krónikanan 28:11-12
3.	Dokumentonan ku plannan pa konstruí e tèmpele - 1 Krónikanan 28:19

- | | |
|----|---|
| 4. | Palabranan di David i Asaf e miradó - 2 Krónikanan 29:30 |
| 5. | Dokumento ofisial di e mensahe di Senakerib - 2 Krónikanan 32:10-15 |
| 6. | Kartanan di Senakerib - 2 Krónikanan 32:10-15,17 |
| 7. | Lamento tokante Josias – 2 Krónikanan 35:25 |

E listanan aki sigur ta indiká 1) ku e outor tabata bon informá i bon dokumentá i 2) ku e outor a usa dokumentonan bon konosí ku ta proba ku su obra tabata konfiabel. Tambe e lista ta proba ku tabatin hopi dokumento di historia di hudiunan. E echu aki ta yuda konfirmá ku nos Beibel ta konfiabel

En bista di loke nos a kaba di nota den e buki di Krónikanan, ta tristu ku Krónikanan ta un buki tan neglighá. Esaki ta un buki ku ta kontené tantu instrukshon balioso. Hopi bendishon sigur ta spera esun ku ta studia e buki aki ku atenshon!

Literatura Konsultá

- Alexander, David & Patricia, ed. *Eerdman's Handbook to the Bible* (Grand Rapids: William B. Eerdmans Publishing Company, 1973), p. 286-303.
- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 449-456.
- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 85-88.
- Dillard, Raymond B. & Logman III, Tremper. *An Introduction to the Old Testament* (Grand Rapids: Zondervan Publishing House, 1994), p. 169-177.
- Harrison, Ronald Kenneth. *Introduction to the Old Testament* (Grand Rapids: William B. Eerdmans Publishing Company, 1969), p. 1152-1171.
- Hill, Andrew E. & Walton, John H. *A Survey of the Old Testament* (Grand Rapids: Zondervan Publishing House, 1991), p. 216-227.
- Jensen, Irvin, L. *Jensen's Survey of the Old Testament* (Chicago: Moody Press, 1978), p. 207-216.
- MacArthur, John. *MacArthur's Quick Reference Guide to the Bible* (Nashville: W. Publishing Group, 2001), p. 60-66.
- Mears, Henrietta C. *What the Bible is All About* (Minneapolis: World Wide Publications, 1966), p. 141.
- Schultz, Samuel J. Tenney, Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 1, p. 809-815.
- Payne, J. Barton. Gaebelien, Frank E. ed. *The Expositor's Bible Commentary*: (Grand Rapids: Zondervan Publishing House, 1988), vol. 4, p. 301-324.
- Richards, Lawrence O., redactor general. *The Revell Concise Bible Dictionary* (Tarrytown, NY: Fleming H. Reveel Company, 1991), p. 122-123.
- Wilkinson, Bruce & Boa Kenneth. *Talk Thru the Bible* (Nashville: Thomas Nelson, 2002), p. 99-115.
- Zuck, Roy. Artíkulo di Bibliotheca Sacra tokante contenido di Krónikanan.